

**La Clapouiro**

**Vau-Cluso  
e Leberoun**



**C.I.E.L. d'Oc**

Centre International de l'Écrit en Langue d'Oc

3 Place Joffre, 13130 Berre L'Étang

<http://www.lpl.univ-aix.fr/ciel/>

# LA VAU CLUSO

*La Clapouiro aguènt fa chausido aquest an pèr temo d'estùdi*

*Couneissènço de La Vau-Cluso*

*tout de long de l'annado avèn assaja de mies counèisse lou païs, si vilo e vilage, si mountagno e si colo, si plano e si cresten, si culturo.*

*Aquéu libret represènto pas un estùdi coumplet e saberu, vòu tout simplamen retraire lou camin qu'avèn segui au debana di mes dins aquelo annado 2000.*

*Avèn de gramacia.aquéli qu'an pourta soun ajudo e soun amista à noste group...*

*La vesito dóu vignarés di Costo de Rose de la Coumtat fuguè acoumpagnado de segne e dono Leraut e de segne Bernat Vaton.*

*Es en coumpagno de dono Genevivo Pinet qu'avèn fa la vesito dóu Palais di papo d'Avignoun e de Veisoun la roumano.*

*Participèron à l'alestimen dóu libret : Mirèio Barême, Camihe Barême,*

*Magui Gross pèr la vido de Micoulau Saboly,*

*Chantal Escalle pèr lou Ventour,*

*Viviano Roux pèr la vesito dóu païs di Sorgo,*

Ancian coumtat de Venisso, soun noum ié vèn de sa proumiero capitalo Venasco que, pau à cha pau, lou noum se tremudè en Venisso; en francés "le Comté Venaissin). Fasié partido di terro dóu marquesat de Prouvènço. Passè pièi i Comte de Toulouso en 1125. Venguè pièi restaca à la Franço en 1227; lou rèi "Philippe le hardi" n'en fai pièi douno au Papo Gregòri X en 1274.

Desempièi, li papo restèron voulountié dins sis estat de la Coumtat que couneiguè uno tempouro trelusènto de desveloupamen culturau, artisti e tambèn religious.

Lou terraire demourè "estat pountificau" de tèms e de tèms après lou despart dóu darrié papo d'Avignoun.

Es en 1793 que la “Convention” creè lou despartamen de la Vau-Cluso; èro lou 87<sup>en</sup> despartamen francés.

S’atrouvavo fourma d’uno grandò partido de la Coumtat, de la principauta d’Aurenjo, dis estat pountificau e de quàuqui ciéutat que ié fuguèron restacado: Vaurias, Grilloun, que formon encaro vuei l’enclavo vau-clusenco en país droumen.

Lou país èro limita au pounènt pèr lou Rose, à l’uba pèr Ventour e dóu coustat miejournau pèr Durènço.

Quàuqui ribiero: Lou Calavoun que travesso Ate e que s’en vai rescountra Durènço à Cavaïoun.

Ouveso, li Sorgo e la Nesco.

Li relèu forço desparié an delimita de regionn tambèn despariero, caduno aguènt soun especificeta e si particularita:

La plano de la Coumtat, drudo e abelano vèi crèisse fruchau, primour e subre-tout un vignarés de grosso renoumado emai de chaine rabassié que dounon un drudige de mai en aquelo regionn.

Ventour amoundaut segnourejo de si 1902 metre, d’ivèr enmantela d’uno ufanouso jargo blanco, d’estiéu “fasènt vèire tout” (Jan-Enri Fabre)

Leberoun e si fourèst de cedre emai soun planestèu di Claparedo, recate di vièii pèiro e dis anciàni bòri...

Li mount de Vau-Cluso emé la celèbro font que gardo encaro vuei bono part de soun mistèri...

Sault e lou planestèu d’Albioun emé d’estiéu, lis erso oundejanto e prefumado di lavando en flour.

De vilo grandarasso e en pleno expandido: Avignoun que miraiò dins lou Rose si clouchié merleta, de viloto plasènto Carpentras, celèbro pèr soun marcat i rabasso, Cavaïoun e soun especialita li meloun.

Veisoun, Aurenjo e si mounumen rouman tras que bèn counserva e l’Ermas, oustau de Jan-Enri Fabre, l’entoumoulougisto doubla d’un pouèto prouvençau; se dis que sarié possible qu’aquel oustau venguèsse apara coume se dèu e segur que n’en sarian tras qu’urous... Ate la vilo di fru counfit...

De vilage vièi e pintouresc coume aquéli acrouca au pèd de Leberoun que gardon souvenènço d’un passat, au cop riche e souvènt tragi.

E aquéli que, alentour de Ventour, siegue dins la plano, siegue sus li pendis di Dentello, alestisson li grand vin que fan la renoumado de la Coumtat.

En deforo di destrich amenistratiéu, destriaren e assajaren de mies counèisse, de fes meme de descurbi, quàuquis-un demié aquéli país tant desparié de la Vau-Cluso o de la Coumtat.

*Lou país d’Ate e lou país de Leberoun.*

*Lou país di Sorgo.*

*Li país de Ventour.*

*Lou país de Veisoun.*

# Ventour

“*Ventour ! sage qu noun ié torne ! fòu qu ié fai retour!*” Es ansin que Mistral parlo dóu Gigant de Prouvènço, retour d’uno escourregudo perihouso dins la moutagno.

Ventour! lou gigant de Prouvènço s’aubouro de 1909 mètre au dessus de la plano de la Coumtat, mai sa cimo desnudado se devino de touto part dóu païs. Es que recuberto de lauso e de code, ivèr estiéu blanquejo coume nèu au soulèu.

La roco cauquiero que lou massis n’es fa, dins lis ivèr rigourous se fendasclo e s’espeto en milànti clap que, à cha un, soun vengu recurbi la cimo.

A l’uba, es dessepara de la mountagno de Bluie pèr la valado souvènti-fes forço ribassado, dóu Toulourenc.

Au miejour es la Nesco que lou desseparo di Mount de Vau-Cluso, aguènt cava de gorgo estrecho, pièi:

*Aquelo Nesco s’encafournò dins uno baumo arèbro e sournò*

*E vèn pièi un moumen que la roco subran*

*S’enarco amount qu’es pas de dire,*

*Vous parle dóu roucas dóu Cire...*

Es aqui que Calendau venguè rauba soun mèu is abiho fin de l’óufri à la fado Esterello. Aquéu roucas dóu Cire s’aubouro fièr sus lou courrènt de la Nesco.

Au pounènt la plano de Malauceno l’aliencho di Dentello de Mount-Mirai. Lou massis de Ventour s’estiro sus 24 kiloumètre. Soun pendis ubacous es forço ribassu, lou pendis miejournau davalo en pendo douço vers plano coumtadino.

A prepaus dóu noum, tóuti soun pas d’acord emé sis óurigino. Lou *Tresor* de Mistral douno pèr esplico:

“Mons ventosus, Mons venturius” es ansin que s’apelavo lou mount en latin dins lou siècle desèn.

Maire fai veni lou noum dóu celte “ven top” que vòu dire Tèsto blanco, e tant se poudrié que, es bèn verai que Ventour de longo dins l’annado mostro tèsto blanco.

## *L’aigo*

Ges de ribiero dins lou massis e nimai de cascado. Pamens l’aigo dins lou soto-sòu es presènto e ressourgènto à rode, en sourço dicho vauclusiano; eisèmple lou sourgènt dóu Grousèu, proche Malaucèno sus la routo de Ventour. Es di fendasclo cavado dins lou baus, aut de mai de ceènt mètre, que sourgènto l’aigo que vèn fourma à si pèd uno meno de lauset dis aigo clarejanto, d’aubre se ié miron dedins e fan d’aqueste rode un endré forço plasènt e agradiéu.

Li rouman, grands amateur d’aigo lindo, segur que poudien pas manca de counèisse lou rode e avien basti un porto-aigo fin de coundurre aquélis aigo tant claro vers Veisoun.

Quàuquis sourgènt pamens à l'uba, eisèmple la sourço de Fontfiolo que, dins la tempouro di gròssi plueio vai raja dins un pichot riéu que s'en vai vers lou Toulourenc.

Quatre rivièro rajon au pèd de la mountagno emai ié siegon pas nascudo?

Lou Toulourenc, la Nesco, l'Ouveso e l'Auzoun. Tóuti an un regime irregulié. Li pluïasso de l'autouno e de la primo fan, de cop, crèisse lou nivèu dis aigo e soun l'encauso dóu desbord pau o proun impourtant d'aquéli rivièro, desbord que podon veni meme catastrofo coume s'es vist, fai quàuquis annado, à prepaus de l'Ouveso. Lis aigo de la rivièro desboundèron e venguèron inounda la vilo empourtant li veituro e negant forço mounde.

L'estiéu, li plueio soun de manco e li ribièro s'atrobon quàsi en secado.

### *Lou climat*

Ventour s'aubouro de 1909 mètre en dessus de la plano ; acò douno uno diferènci climatico forço impourtanto.

Au pèd de la mountagno, lou climat sara à quaucarèn proche mieterran, emé d'estiéu caud e d'ivèr pas trop fre.

En cimo, lou climat es rigourous. Li jour de plueio soun mai noumbrous e li precipitacioun mai impourtanto.

Quàuqui mes dins l'an, la cimo es recuberto d'un mantèu de nèu e la routo pèr se gandi tout en aut es enebido à la circulacioun. La nèu aboundouso fai lou bonur dis esquihaire que trèvon lis estacioun touristico amenajado au mount Seren à l'ubac e i chalet Reynard à l'adré.

Lou vènt tèn un role impourtant, lou mistrau subre-tout boufo emé vioulènci, souvènti fes forço desagradiéu. Lou massis i'es devènt pamens d'un cèu la mage part dóu tèms pur, sènso neblo que ié baio un souleiant precious.

### *Lou plantun*

A grando diferènci d'autitudo entre lou pèd de la mountagno, gaire mai de cènt mètre à Carpentras, e la cimo douno tambèn d'estage de vegetacioun diferènt.

Dins l'en-bas de la mountagno atrouvaren li planto e li flour especifico de Prouvènço, lavando, roumanin, pebre d'ase... entandoumens que sus la cimo, li boutanisto auran la souspresso de descurbi un flourun aupen, eisèmple se lou sabès cerca e s'avès un pau de chanço, lou pavot dóu Grouenland e la sassifrajo dóu Spitzberg.

Li pendis soun lou reiaume di faiard, di roure, di pin d'Alep, quàuqui mele (aquéli que resistèron à la destrau de Calendau, belèu?)

A l'autitudo de 1600 mètre, plus ges de vegetacioun, sian dins lou reiaume de la pèiro! Li séuvo que curbien li pendis fuguèron desnudado dins lou siècle segen pèr fabrica de mast pèr li batèu. En 1860 se recoumencè de tournamai planta d'aubre que, à l'ouro d'aro, fan à la mountagno un ufanous mantèu de fourèst. Jan-Enri Fabre, lou celèbre entoumoulougisto prouvençau escriguè :

*“Une demi-journée de déplacement à la verticale fait passer sous les regards la succession des principaux types végétaux que l’on rencontrerait en un long voyage du Sud au nord suivant le même méridien. Au départ vos pieds foulent les touffes balsamiques du thym, dans quelques heures ils fouleront les sombres coussinets des saxifrages à feuilles opposées, la première plante qui s’offre au botaniste débarquant en juillet sur les rivages du Spitzberg.”*

Es pamens verai que tóuti aquéli tresor, li fau cerca e bèn cerca, subre-tout se sias pas un boutanisto d’elèi.

Pèr se gandi enjusqu’à la cimo, dous itineràri soun pouossible. Se pòu parti siegue de Bedouin siegue de Malaucèno.

Es sèmpe uno gau grando de faire l’ascencioun de Ventour en touto sesoun.

Au printèms li flour margaion la séuvo, l’ivèr lis apassiouna d’esqui faran meraviho sus li pendo.

D’autouno, li cercaire de champignoun, encaro que la culido dèu èstre reglementado trevaran li bouissounado. De mai li coulour autounalo de la séuvo pinton un païsage superbe.

D’ivèr, fau cregne li mistralado que de cop vous empacharien, o quasimen, de sourti de la veituro! L’estiéu la séuvo vous semoundra l’oumbro requisto pèr vous proumena e l’autitudo impourtanto de la mountagno vous pourgira un pau de frescour.

La proumièro ascencioun couneigudo de Ventour fuguè aquelo de Petrarque. Acò se debanè au mes d’abriéu de 1336. Lou grand pouèto italian vivié dempièi soun enfanço dins lou rode. De vèire de longo aquelo mountagno ié dounè l’idèio de se gandi enjusqu’en aut. Es bèn segur que lou pouèto fuguè amiratiéu di païsage descubert e n’en servè un souveni qu’oublidè jamai. Mai lou pouèto èro tambèn un grand filousofe e, de soun escourregudo, n’en tirè mànti perpensamen.

*“les épreuves que tu as endurées tant de fois aujourd’hui, dans l’ascension de cette montagne, sache bien que tu les rencontres aussi, toi comme tant d’autres, sur le chemin du bonheur. Au sommet est la fin suprême, le terme de la route auquel tend notre voyage.”*

Ansin faguè, Petrarque, lou raconte de soun escourregudo à soun ami, escourregudo ounte noun cercavo de coumpli uno prouèssio fisico, mai soulamen de poussa dins soun cor de perpensamen que lou metien, aqui sus lou cèu, mai proche Diéu.

Mistral éu-meme mountè au Ventour emé sis ami dins uno escapado galoio e n’en dounè un raconte que s’atrobo dins *“Memòri e raconte”*, raconte goustous segur! mai pas filousoufi!

Rejounneguèron la cimo sus de miòu. Li jouvènt avien pièi decida de davala soulet, d’à pèd, dóu coustat ubacous, lou plus ribassu. Resquihant sus li roco lusènto... tombant dins de regoulou e montant tournamai sus lou ribas... pèr, fin finalo, arriva emé grands esfors enjusqu’au vilage. Semblavon de vagabound qu’aguèron forço peno de se trouva un loujamen pèr la niue!

A l’ouro d’aro es pièi pas tant dificile de se gandi à la cimo. De draio soun bèn marcado, partènt siegue de Bedouin siegue de Malaucèno. Poudèn se manda sènso pòu de s’engana o de se perdre.

Pamens la routo es longo, mai coume pèr Petrarque, sian pièi paga de nòstis esfors e di peno en remirant l'inmènse espetacle dóu païs prouvençau que de tout caire, s'espandis souto lis iue.

## Li dentello de Mount Mirai

Lou massis s'estiro sus aperiáqui 12 kilomètre entre la valado d'Ouveso, la plano carpentressenco e, vers lou levant, dessepara de Ventour pèr la plano de Malaucèno e lou defila dóu Barrous. Lou massis a un relèu óuriginau; la roco cauquiero escultado, se poudrié dire escrincelado, dóu vènt e de la plueio, a fourma de peno forço minço, bèn talamen que, à rode, soun cavado de trau pas forço gros, que ié dounèron soun noum de dentello. Eleganto e curioso s'aubouron enjusqu'à 735 mètre; pamens, li pendis cubert de pin, pièi li baus desnuda e lis arèsco fino dounon i Dentello, maugrat soun autitudo pas di mai impourtanto, un pau dóu caratère aupin.

De vilage soun basti que sis oustau, la majo part, dóu tèms escalon lou pendis o se meton, dirias, à la sousto d'un grand roucas coume "La Roco Alric". A l'adré di colo, crèis uno vegetacioun mieterragno. Tout alentour di vilage, recurbènt la plano e sus li pendis di colo, es lou vignarés que s'espandis, un vignarés di noum famous que fan lou drudige de la regioun.

## Li Costo de Rose

Quouro li fouceian venguèron planta caviho en ribo mieterragno e foundèron la ciéuta de Massalia, adusien em'éli si biais de viéure; vai ansin que, i tribu que restavon long dóu Lacidoun, ensignèron, idèio di mai chanudo! l'art e la façoun de faire de vin.

La vigo, segur qu'èro couneigudo deja dis estajan dóu païs, mai li Grè i'ensignèron la viticulturo. Se pòu bèn dire que, au debana di siècle e di siècle, lis escoulan an passa si mèstre!

Lou vignarés di Costo de Rose s'espandis long dóu flume dempièi Vieno enjusqu'en Avignoun. Passa Dounzèro, que la valado s'alargo un pau, la vigo se cultivo en dedins di terro, de Vaurias à Castèu-Nòu dóu Papo. Dins la plano proche lou Rose, segnourejo lou vin ufanous, glòri de Prouvenço, lou Castèu-nòu di Papo. Se dis que, d'aquéu precieus vin, n'en sarien devènt au Papo Jan XII. Li boutiho monte es rejoun lou vin famous soun li garanto de soun óurigino, marcado que soun is armo di Papo.

Proche li Dentello, la vigo recuerb li pichot planestèu, lou pèd e li pendis di colo.

Lou rasin s'amaduro e s'assabouro e s'abounis dins li vignoble bèn à la calo de renguero de ciprés o di lamo de roucas di Dentello.

Un vignarés ounte canton li noum renouma de Gigoundas, Vacqueiras, Sablet, Seguret, Baumo de Venisso, Rastèu, ourguei e richesso dóu païs.

### *Sus la draio viticolo de Rastèu*

Segne Bernat Vaton, segne e dono Leraut acoumpagnèron noste group sus la draio que serpetejo dins lou vignarés, draio signalisado de panèu que se recounèisson eisa: porton pintado uno fueio de vigno. D'entre-signè soun marca sus cade panèu toucant lou vignarés e permeton, à cade pas, de s'assabenta sus lou païs.

Segne Vaton nous menè sus la draio, nous dounant à flour e mesuro tóuti lis esplico à prepaus dóu vilage, l'ancien e lou mouderne, à prepaus de la vido ecounoumico tambèn, virado naturalamen vers la prouducioun viticolo de vin de qualita.

Lou vilage vièi es basti sus l'auturo coume èro necite dins aquéli tèms que fasié mestié de s'apara dis envahissèire de touto meno. E fau pensa que, en aquelo epoco la Coumtat èro poussessioun de la papauta. De mai, li jusiòu que Felipe lou Bèu couchè de Franço atrouvèron eici un recate... d'en proumié en Avignoun, pièi dins li vilage alentour ounte, après la "Sant Bartelemy" lis uganoud venguèron éli tambèn dins lou païs ounte atrouvèron la sousto; e tout acò, de segur, èro pas dóu goust di rèi e di gouvèr... e coumprenèn que, de toustèms li proublèmo fuguèron pas de manco. D'aquéli tèms demoron encaro li soubro di bàrri, la porto emé lou clouchié-arcado, lou reloge. La glèiso Sant Deidié es dóu siècle dougen. Li carreirouno, de cop que i'a en escalié, fan lou tour dóu roucas e lis oustau di vièi pèiro souvènti-fes restaura emé forço goust soun tras que poulit. Dins lou siècle dès e vuechen qu'èro plus tant necite de se quiha fin de s'apara, lis oustau coumençon de leissa l'auturo e vènou basti sus li pendis.

Au siècle dès e nouvèn s'estalouiron dins la plano coustru pèr uno pouplacioun virado, semblarié, vers lis ativeta de la vilo la mai procho, Aurenjo, pulèu que vers lis ativeta de la terro.

En mai de la draio viticolo, lis estajan an crea uno draio boutanico que douno vèire la diferènci dóu flourun especificamen mieterran dins la plano e lou flourun submieterran. Es la draio de Piebressoun, longo e quasimen 7 kiloumètre.

Lou vignarés de Rastèu pren plaço sus li pendis, souvènti fes fatura en restanco, e davalo vers la plano; óucupo peréu li rode bèn à la calo di pichòti colo.

La prouducioun es diversificado: vin rouge capitous, à parti de cepage de grenache, cinsault e mourvèdre e lou vin dous naturau.

Eici lou vin dous es rèi! e lou vin de Rastèu faguè lou renom de soun vilage. Dins Vau-Cluso, rèn que dos coumuno s'ameriton l'apelacioun "vin dous naturau" Baumo de Venisso e Rastèu.

Lou rastèu s'amagestro emé de rasin de grenache e rèn autre. Lou jus de rasin es mes à rebouli. Lou reboulimen es pièi arresta au moumen requisit emé un apoundoun d'alcool néutre. Lou degat es lou plus pau de 15, se bèu subre-tout en aperitiéu.



## *Lis apelacioun*

Pèr recounèisse li qualita d'un vin, si caratère e sa valour, se dounon d'apelacioun especifico.

Es en 1923 que un viticultour de Castèu-nòu dóu Papo imaginè de douna de règlo à la prouducioun vinicolo de soun païs. Aquéli règlo toucavon la fabricacioun dóu vin, li liò geougrafi, li soucage, la taio.

Tóutis aquélis eisigènci caupon vuei dins l'apelacioun A.O.C., valènt à dire "apelacioun d'óurigino countourroulado". Li vigno, pèr s'amerita aquelo apelacioun avien d'èstre plantado sus de terren dóu "miouceno". Trege soucau èron autourisa. Vuei, en dedins di vin A.O.C., s'es establi uno classificacioun nouvello segound di soucau.

### *Apelacioun "Costo de Rose Vilage"*

Li soucau utiliza soun :

Pèr li vin rouge: grenache, lou plus pau 65 %, mourvedre, syrah e cinsault.

Pèr li vin rousen: grenache negre, lou mai 25%, cinsault e carignan.

En 1967 aquelo apelacioun venguè guierdouna quàuqui coumuno de la Vau-Cluso pèr la qualita de si vin. Aquéli vin se podon metre à la vèndo emé lou noum dóu vilage que lis a proudu: Rastèu, Seguret, Sablet, Baumo de Venisso daverèron lou titre.

Vacqueyras tenguè aquelo apelacioun enjusquen 1990 que si vin an passa la qualita superiouro de: **Aire d'apelacioun loucalo**

Apelacioun qu'ei, dirias, la glòri pèr un vin, partènt pèr lou terraire e lou vignarés que lou proudu. Es de vin que sa reputacioun es couneigudo dempièi long-tèms.

Se soun amerita aquel ounour pèr la Vau-Cluso:

**Castèu-Nòu dóu Papo** pèr soun vin rouge emai blanc. Lou vignarés fuguè planta dins li tèms que li Papo restavon en Avignoun. Aguè de pati dóu filoussera e venguè tournamai planta. Sa renoumado duro dempièi lou siècle dès e vuechen.

**Gigoundas** pèr lou vin rouge subre-tout mai tambèn pèr soun rousen.

**Vacqueyras** dempièi 1990 pèr soun vin rouge, blanc e rousen.

### *Aire d'apelacioun d'óurigino Costo de Rose*

Pèr li coumuno qu'amagestron de vin que soun bon mai que, pamens, an pas trouba plaço dins li dos categourio çai-subre. Aquéli represènton la majo part dóu vignarés di Costo de Rose.

Demié li cepage chausi, lou grenache l'es pèr sa puissanço, lou mourvedre pèr soun prefum, lou cinsault pèr sa finesso.

# Li vilage entre vignarés e Dentello

## Vacqueiras

Un di mai prestigios demié li grand vin de Costo de Rose, s'ameritè, l'avèn vist, l'apelacioun *Coste de Rose, aire loucalo Vacqueyras* en 1990. Pamens, la vigno èro de tradicioun forço anciano dins lou rode, li proumié plant soun marca tre 1577.

Un di vilage demié tóuti aquéli que, counsacra au vin e à la vigno, soun basti sus d'un suquet, vilage redoun que si carriero mounton, dirias, à l'assaut de la colo en s'envertouiant autour d'un roucas. D'en aut, la visto s'expandis sus uno mar de vigno que sèmblo n'agué ges de fin, enjusqu'au liuen que lou Rose ié bourdeje uno ligno de colo vers Ardècho.

Lis oustau s'aubouron à la sousto di bàrri, o de ço que n'en soubro, trauca de dos porto que uno es subre-mountado de la tourre dóu reloge. Vacqueyras aguè lou privilège de douna neissènço à un troubadour famous Raimbaud de Vacqueyras. Soun ispiracioun e la diversita de si pouèmo e de si cansoun lou fan dire un di grand pouèto de soun tèms,

## Gigondas

Proche es lou vilage de Gigondas que 'agroumelis, éu tambèn dins l'estile de tóuti aquéli vilage proche li Dentello, contro uno colo ribassudo.

Vilage redoun éu tambèn, que si carriero escarlimpon lou roucas, bourdado de bèus oustau de pèiro, restaura emé forço goust. Tout en aut, vers la gleiso santo Catarino, li vestige di bàrri. Sus uno colo procho, la capello Sant Damian e sant Como, au mitan di vigno que venon sus li pendis. La routo se countùnio, vèn pièi uno simple draio que, passant dóu còu dóu Cairoun meno vers l'ascencioun di Dentello.

## Sablet

Es encaro un vilage redoun, quiha sus d'un suquet aut de 146 metre, e que si carriero enroulon autour de sa glèiso dóu siècle dougen. A l'entour dóu vilage se pòu vèire la capello Sant Miquèu bastido en 1720 en gramaci à Dieu que la pèsto avié espargna lou vilage.

## Seguret

Sara de tout segur un di mai bèu demié tóuti aquéli vilage dins lou vignarés. Se presento coume un bescaume sus la Coumtat.

Lis oustau soun basti parieramen en cièucle sus lou suquet. Tout en aut de la pichoto colo, es la glèiso roumano; se veson tambèn li rouino d'un ancian fort. Dos porto barravon l'intrado; la porto de l'auro e la porto dóu sud.

# LOU LEBEROUN

La cadeno de Leberoun s'estiro dóu levant au pounèt, de Manosco à Cavaïoun sus aperiaqui 65 kiloumètre. Lou pendis ubacous s'atrobo forço ribassu, e davalò soude sus la plano. Lou pendis miejournau, pas tant ribassu, s'estajo pulèu vers la plano.

Pèr franchi la mountagno, rèn qu'un soulet passage, la coumbo de Lourmarin que desseparo la cadeno en dos partido.

De Lourmarin à Ate: **Lou Grand Leberoun**, di cimo arredounido que la plus auto a pèr noum lou "Mourre Negre", que s'aubouro enjusqu'à 1125 mètre d'autitudo.

D'aquí la visto s'alargo e, d'un coustat l'autre, se vèi tout l'espandidou:

- dóu coustat dóu piemount miejournau vers Ventùri e lis Aupiho;

- dóu coustat dóu piemount ubacous vers la mountagno de Luro, la valado de Durènço, lou planestèu de Vau-Cluso e, mai proche, lou païs d'Ate e la valado de Calavoun, ribiero o pulèu vabre que davalò di gorgo d'Oupedeto. La majo part dóu tèms asseca, vengue l'aurige, se pòu gounfla dins rèn que quàuquis ouro e veni ennega la valado e la vilo d'Ate. Lis ancian, à-n-aquéli mountado dis aigo dóu riéu i'avien mes "li cauvounado".

**Lou Pichot Leberoun**, mai moudeste pèr soun autitudo 720 mètre, se presènto pulèu parié à de planestèu cava de gorgo de cop prefoundo e de vabre o gaudre. Sus lou pendis vira vers lou miejour, lou climat es pulèu mieteran e parié pèr sa vegetacioun; aquí atrovaren lou roumanin, lis auciprés e li chaine.

Sus la cimo crèisson li faiard, li pin e li cedre de l'Atlas. Aquélis aubre soun pas naturau dins lou massis; soun esta planta en 1863 e, à bèl èime, an fa soun espandido.

Après Lourmarin, vilage basti au piemount miejournau, la routo s'esquiho dins la coumbo e, seguissènt la pichoto valado de l'Aigo-broun, mounto vers lou còu dóu Pouchu; davalara pièi, rapido, travessant lou planestèu di Claparedo, vers lou païs d'Ate.

Lou Leberoun es esta classa “pargue naturau regiounau” en 1977. Lou pargue recueyb 140.000 eitaro e aperiáqui 60 coumuno, tant dins lou despartamen de la Vau-Cluso que dins aquéu dis Aup de n-auto Prouvènço.

La voucacioun dóu pargue es d’apara lou mitan naturau e soun equilibre emai de desveloupa li coundicioun de vido dis estajan e sis ativeta agricolo. Deja an crea d’oustau d’infourmacioun en Ate, à Buous, e La Tourre d’aigo. De mai, soun estado traçado li draio de descuberto dins la fourèst de cedre (Pichot Leberoun) dins li terro coulour d’arcano (*les ocres*) de Roussihoun e de Rustrel.

Antan, fai d’acò mai de 220 milioun d’annado, aqui fuguè la mar. N’en porton testimòni li foussilo di couquihage que s’atrovon dins lou massis. S’es meme descubert de dènt de requin foussilisado dins lou relarg de Cucuroun, pichot vilage au miejour de la cadeno.

Pau à cha pau, au debana di milenàri, se coumblè la mar. Faudra pamens espera li 80 milioun d’annado davans l’èro nostro pèr qu’enfin lou Leberoun faguèsse surfàci e tambèn lou païs que vendrié, un jour, la Vau-Cluso.

Dins la sablo abandounado pèr la mar, lis argiello richo de ferre dounèron i païsage li coulour esbrihaudanto, roujo, jauno, vióuleto que fan di colo de Roussihoun, lou bèn nouma, emai de Rustrel, un païs dóu relèu estrange e forço acoulouri qu’apelèron lou “Colorado prouvençau”

## Istòri

La presènci de l’ome dins Leberoun es atestado tre li tèms pre-istouri, majamen dins lou relarg de Buous: descuberto dins li baumo di pendis ribassu de la valado de l’Aigobroun de tros de pèiro taiado pèr servi d’óutis o d’armo, descuberto tambèn de toumbo cavado dins lou ro, (se n’en pòu vèire quàuquis uno proche l’avançado de roucas espetaclouso proche lou fort de Buous.)

Vèn la fin de l’epoco neoulitico, es lou tèms que lis ome laisson si baumo e s’alienchon dis avançado de roucas ounte s’aparavon de la fre emai di bèsti fero. Sabon, aro, se basti de meno d’oustaloun e coumençon de se faire abarissaire pulèu que cassaire e païsan pulèu que rapugaire.

Dins lou tèms que li ligour ócupavon aquèu terraire, lis ome rèston sus li *oppida*. Pèr basti un *oppidum*, lis ome se chausisson un rode que sara eisa d’apara; souvènti fes se bastis sus un esperoun roucassous, que de dous o tres coustat lou bourdejon de pendis forço ribassu, rendènt uno ataco au tout impoussible. Lou darrié coustat es barra d’uno muraio forço espesso em’uno souleto porto pèr rintra, acò sèmpe emé lou soucit de rendre mai facile l’aparamen dis oustau e di gènt.

De mai, d’aquí, quiha sus l’esperoun, sara eisa de gueira la plano e de s’avisa d’uno arrivado pousible d’ennemi.

Se pòu vèire de soubro sus la colo de Perreal proche Gargas, dins lou païs d’Ate.

Li rouman leissèron tambèn de vestige dins lou rode, subre-tout lou pont Julian, proche Ate. Lou pont rouman encambo lou Calavoun. Fuguè basti tres siècle davans Jèsu sus l'antico "Via Domitia" que menavo d'Itàli en Espagno. Es fa de tres arco e de dos pilo cavado de duberturo cintrado fin de leissa passa lis aigo se d'asard lou nivèu venié à mounta.

Lou fort de Buous presènto li soubro de tóuti li civilisacioun que, à de rèng, venguèron viéure e s'apara sus lou planestèu, enjusqu'au regne de Louis lou quingen que lou faguè aclapa.

Lou Leberoun gardo souvenènço tambèn di lucho contro li Vaudés refugia dins li vilage quiha sus li pendis. Li vaudés refusavon li sacramen e l'oubeïssènço à la ierarchiò religiouso. Lou parlamen de z-Ais decidè de n'en fini emé aquelo eresìo e pronouciè l'"Arrèst de Merindou" que fuguè aplica en 1540.

En forço vilage ié fuguè bouta fiò. Aquéli, demié lis estajan, qu'escapèron au chaple, fuguèron manda i galèro reialo.

La vioulènci coungrèio la vioulènci e li chaple e li destrucioun s'ourganisèron dins touto la regioun.



# La Clapouiro pèr lou CIEL d'Oc

© 2001